

3

T 3223/1432.81



建寧府志卷之四十六

雜志一

志備史之一體也義取勸懲事資掌故是以君子  
采焉何取於雜宇宙大矣靡所不有建州晉宋  
以來千百年間其人與事有能使人法使人戒  
使人馮而弔使人以方外之意銷其名利又能  
佐父老之抵掌而嘆承平之不易也槩諸勸懲  
掌故之間安得曰歸餘於是不然春秋於星隕  
石變災禋之屬何詳哉其言之也峴山之碑延

哈佛大學漢和  
圖書館珍藏印



陵之表何以至今千載也竺乾柱下亦猶是副  
在石室何以至今不刪也探丸赤白何以備謹  
之也然則拾遺者何固其人之不可湮滅而事  
爲足傳者夫亦曰可以興可以觀云耳物相雜  
曰文其文則史是備史之一體矣志雜志  
雜志一  
災祥

晉

大康八年十二月癸卯雷電大雨

唐

大歷二年水災

貞元十二年大水

嗣聖九年蝗

建中二年建陽建忠里孝子劉常廬墓產芝一莖  
一莖長尺二寸一莖長尺一寸如鷄冠形紫色  
扣之作金石聲

崇太里孝子熊袞父亡不能葬天雨錢三日

唐末建陽縣山有雙松連理又有雙竹產於輿下



里威懷廟外樹柯中

邑人因呼其地曰蓋竹建人方言與怪同音疑所謂

蓋竹當為怪竹也舊郡志所載不著年月姑存之

宋

淳化三年十二月建安軍城西火燔民舍官廨殆

盡

至道二年七月大水漲溢入州城壞倉庫民舍萬

餘區

天聖三年春二月一日崇安縣大風雷雨武夷五

曲石堂陷為潭

天聖四年六月丁亥大水詔賜被災家米一石溺

死者棺瘞之

寶元元年自正月雨至四月溪水大漲入州城壞

民廬舍溺死者甚眾賜死傷家錢有差無主者

官葬祭之

至和五年三月崇安縣嘉禾一本九十莖

治平四年秋地震

熙寧元年八月大雷雨州民楊緯所居之西有黃

龍見



政和四年八月州境竹生米數十萬石

紹興元年十二月大雪深數尺查源洞寇張海作亂民避入山多凍死戊申海寇浦城焚五百家  
二年二月庚寅朔大風雨雹什屋殺人三月癸酉大風雨雹如桃李實平地盈尺壞廬舍五千餘家禾麻蔬菜皆損五月戊申水

乾道四年六月旱

五年七月丁巳瑞應場大際山棗等山暴水湧出漂民廬舍溺水者甚衆

淳熙四年五月庚子大雨三日漂民屋數千  
十五年水圯民廬

慶元六年五月庚午大水五日漂民廬害田稼  
嘉泰二年七月水害苗稼丙午建安縣風軍廬舍漂沒百二十餘丁未山崩壓民廬七十七家

嘉定十一年旱

十七年五月大水沒平橋入城

淳祐十二年六月大水浸城漂民舍死者甚衆

景定元年建陽縣嘉禾生一本十五穗改建陽縣



爲嘉禾縣

元

後至元元年饑

至正三年秋浦城縣民家豕生豚二尾八足

十一年十一月浦城縣雨黑子如稗實

十九年四月己丑有星墜於營山前其聲如雷化

爲石

明

永樂十四年七月望大水入城壞城郭漂屋舍民

溺死者甚衆

成化三年六月幾望地震

八月既望松溪縣雨雹

十六年九月壬戌暮有火星自西北奔流東北其

色赤其形長其尾如炸其聲如雷數刻始沒

十九年五月戊戌浦城連日驟雨庚子西南鴈塔

等六里山水泛溢高三丈餘山崩地拆漂民舍

一百三十餘家壞橋梁十三砂淤民田三十八

頃有奇溺死者四十八人



二十一年夏至雨山水驟溢建安甌寧建陽三縣鄉市民舍多壞瀕溪聚落屋舍蕩壞尤甚人畜溺死

正德元年正月朔正北天裂紅光濶二丈長數十

丈有頃光滅自下而上若捲席然建陽松溪崇安志同是

十年崇安縣饑二年大饑

十六年壽寧縣夜半地震房屋剗然有聲

嘉靖七年四月望壽寧縣龍過往復升降尋雨雹

人畜屋瓦皆害

十三年四月十三日建陽松溪大水

三十年五月十日松溪大水翼日建陽大水

三十一年五月十一日郡城大水城中以舟行

三十九年八月崇安青見自南來民家歎桃柳震

金鼓禦之兩月始息

四十年春崇安縣鼠引羣自成渡溪夜宿於樹夏

四月雨雹六月大雨雹鳥獸多擊死

隆慶二年夏六月崇安大風自東而南什學宮左

右廡及城隍廟鐘樓並民舍秋七月雨雹如彈



萬曆元年八月十日郡城地震

十三年管門巷火巷隘火急民踉蹌死者二百餘人

十五年二月十三日定安坊火延中和坊水街頭民房數千間建甌二縣治西察院城隍廟清軍督糧理刑館俱燬

十五年八月二十四夜建陽火焚朝天橋居民救火死者二十三人

十六年六月建陽蝗

十七年八月望松溪縣火焚普濟橋延城南河棟

十七年建陽大旱夏四月不雨至秋七月

十八年六月初二夜郡政和門火延千餘家城樓

燬

十八年松溪縣大旱夏六月不雨至秋九月

二十三年三月十八日大雨雹大如鷄子小如棋子響如彈丸民屋皆壞

二十八年二月初六夜建陽雨雹大者徑四寸許二十八年八月二十三夜地震自東而西屋宇搖



動

三十一年五月二十一日浦城縣火延四百餘家  
縣庫解宇俱燼

三十二年十一月九日松溪壽寧同日地震

三十六年六月夜浦城大雷烈風擊尊經閣鰲尾  
貫至屋柱惟柱榜四箴碑如故

三十七年五月二十四日夜洪水驟漲雨下如注  
三晝夜舟從城梁上入城樓崩塌漂流通都橋  
及城內外民居溺死男婦無筭自威武門至通

倦門城墻俱壞萬安洲演武塲一帶地方湮沒  
殆盡兩縣治東西察院各館署衙門一時俱圯  
東察院適巡撫徐學聚駐節幾不免父老謂自  
永樂十四年以後水災是年最大甌寧知縣易  
應昌角巾素衣屏騶從行水撫循捐俸買米散  
給溺屍枕藉應昌躬臨掩瘞入月七日壽寧大  
雷雨以風四晝夜水驟漲各山崩裂壓死男婦  
數百口壞田產不勝計

三十八年秋浦城演武亭邊禾熟未穫忽正午大



風從田旋起水珠五丈餘盤旋周遭上下數十  
畝其色轉變不常始白而綠而紅復成焰久之  
乃滅十月二十八日大中寺前和義坊火延民  
屋登科名宦碑坊俱燬惟名儒梓里一坊巋然  
獨存

三十九年六月當午大風通都橋頭敵樓崩壓死  
男婦十餘人巡按陸修祖行縣賑恤

萬歷四十一年五月崇安縣霪雨大水暴漲城門  
堂廨鄉村巨浸廬舍皆圯人畜多死浦城縣水  
漲近河各鄉新興五里房屋漂流人民淹沒田  
地崩塌盡成溪壑

崇禎五年郡中火延燒民屋及甌寧縣學 聖殿  
明倫堂俱燬

八年壽寧縣竹生米歲無九年春遍山竹皆米形  
如小麥值米貴民競採多者發糶每石價一兩  
凡出竹米數千斛民賴以濟

九年大旱官發倉賑饑

十六年郡大旱政和縣竹生米用療民饑



乙酉春正月八日寧遠門哭有武弁巡城詣守者  
 言其狀遣人往政和門城墻皆哭如女子啼聲  
 乙酉夏倉前街魏家鷄生四子狀皆異有生二頭  
 者有頭生於腹下者有頭生於尾後者有生四  
 足者

丙戌年正月天晝晦風湏臾頰紫色大雪雹垂至  
 十餘斤延平以下皆然

丙戌年臨江門外火城樓燬建安西埧山崩壓民  
 居數十區大中寺金剛首折府獄中神像出鬚

長半寸虎自寧遠門入城

國朝

順治四年甌寧縣梅岐里瑪瑙菴前桐枝化為刀

劍形次日遍山皆然又五月大水

夏建安縣南才里鐵場山崩甌寧縣江曆山崩近

山田舍皆損

五年建甌二縣竹生米春禾根生穀四月

大兵克城公署盡燒燬婦女收之府學當事暫駐戟  
 門判事一日判畢退忽斗拱煙發 聖殿自焚



六年荒米一石值五兩

七年建陽縣譙樓燬

九年甌寧縣吉陽里雄鷄變為雌生卵抱雛又松樹生虫樹自死次年僧德容亂各鄉盡墟民避寇入城者死無筭

十一年三月夜大風雨雹髮髯有龍出府學井繞聖殿破壁去明倫堂倒壞初井深七八丈次日只四丈許

十二年荒米一石價如六年值民多饑死

十五年近郊多虎樵蕪絕迹知府謝祖悌募人捕虎其患方息

十八年五月雨黑子如稗實二十二日水越兩日水復大至政和門城崩數十丈西門城崩十餘丈衝通都橋人行屋上編扉作筏以渡四山崩潰如布皆血色自明萬曆己酉後復見此灾

城崩

派民修民窮莫辦忽於行都司址掘得大磚數十坎每坎約千餘塊城賴以修

十八年四月下黑子約十餘日焚之有硫磺氣郡城內外數十里皆然



康熙二年三月大風吹倒府川亭各旗竿折

二年崇安縣大水城壞三處共三十餘丈自新嶺

下至山坳決去石路三十餘里橋七座

四年二月十四日徹夜大雨次早人家水缸有霧

成團收之如硫磺末焚之亦臭

五年九月二十五日寅時地震

二十五年丙寅春多大雨至又四月二十八日天

色晴霽忽於薄暮東西二溪水大漲翼日亭午

水益大漲滄沒甌寧儒學軍糧二廳及建安公

署一郡六門城墻倒壞不計民屋漂流倒壞者

千有餘區松溪浦城尤見洚洞總督部院土國

安發銀三百兩賑濟被水難民

二十八年六月初七夜震雷擊碎甌學 聖殿西

楹大柱二樹并擊西棟螭尾

二十九年四月二十四日雷火燒毀水南善見塔

三十二年二月二十三日善見塔成甫合尖震雷

擊死塔匠四人墜死者二人

兵氛



建寧府

唐

高祖武德四年妖賊武遇陷建州五年刺史謝元治討平之州復

僖宗乾符五年賊黃巢毀州治州人陳巖率鄉兵破之

昭宗景福三年建州刺史徐歸範叛附於王潮

宋

高宗建炎元年建州軍校張員等作亂殺守臣張

勤轉運使毛奎判官曹仔嬰城自守二年轉運

判官謝如意討張員等六人誅之是年六月建

州卒葉儂等作亂陷福州七月入寧德復還建

州帝命御營中軍統制張俊同兩浙提點刑獄

趙哲率兵討之大破儂兵於建州城下儂遜而

降復謀叛尋擒誅之

四年御營前軍將楊勅叛焚建州都統制劉光世

招安之七月建州范汝爲作亂知州事劉子翼

移寓崇安先是范汝爲作亂命統制李捧捕之



復命福建安撫使程邁會兵討之捧擊汝爲於  
建州官軍皆潰捧遜去十月遣前御史臺檢法  
官謝嚮招汝爲十月復命神武副軍都統制辛  
企宗討之十二月汝爲降詔補民兵統領

紹興元年正月謝嚮率汝爲討平建陽山寇劉時  
舉二月以辛企宗爲福建制置使詔企宗及嚮  
罷遣汝爲兵汝爲不聽命六月崇安民廖公昭  
合汝爲餘黨熊志寧作亂既散志寧復與建陽  
丁朝佐合兵陷二縣八月移軍福州討志寧及

江諸賊尋遣御史胡世將督捕十月汝爲復叛  
入建州守臣王浚民棄城走企宗退屯福州十  
一月以孟庾爲福建江西荆湖宣撫使神武右  
軍都統制韓世忠副之二年正月世忠兵至建  
州直抵鳳凰山五月破之汝爲自焚死斬其二  
弟及附賊者餘黨悉平世忠初欲盡誅建民李  
綱在福州馳至救止之建民以全

明

嘉靖三十八年十一月十四日倭寇自浙江太順



縣突入壽寧犀溪武地方人遭殺掠  
四十年八月流賊夜突至城西時承平久民不知  
兵平明逆戰於通都橋敗績始焚橋禦之城守  
七日賊解圍去會叅將戚繼光督兵兼程追之  
盡殲焉戚公與兵憲豪飲三鼓未罷而辰刻破  
賊會食人以爲神又叛卒袁三黃鳳自信州殺  
掠斬關入建陽焚廬舍橋梁民死無筭更流賊  
屯松溪城東賊每戰輒麾大旗旗如魚網縑布  
爲之邊綴鉄鈎芒如刺松兵逆戰以筭手開陣  
火藥隨之賊旗一麾筭鈎相錯火焚其旗賊敗  
燒營夜遁

嘉靖四十一年十一月十七日倭寇攻陷壽寧焚  
掠不可勝數四十二年正月本縣山賊劉大眼  
等乘機起剽掠諸村落十二月倭寇屠壽寧政  
和二縣松溪戒嚴縣令懼獻金請和寇荅書悖  
慢松人陳春等大憤懸軍令議和者斬倭至河  
東松人方明惠伏弩殺其渠魁三人倭抵城下  
松兵前哨出戰敗之斬首十餘級倭少挫次日



攻圍八門三晝夜倭恃鳥銃而松善弩技倍之  
寇無所施乃佯解去散劫諸村暗造雲車雲梯  
衝城梯之制高僅及梁眼上覆牛皮以蔽矢車  
制高出梁上分三層一車可容百人四面蔽以  
牛皮僅開銃眼窺城上先是倭退時松人遽解  
嚴唯諸生陳桂范茂先黃澹等知倭狡計力言  
不可忘備令惑於奸細復持金酒往犒張筵河  
上飲之扮游兵爲令陪於東門三聖祠倭望見  
令左右有金甲三大將蓋石鹿皂筴神也席罷  
倭酌刀一柄忽有被掠二童子及倪繼六者隔  
溪報倭狡計於是陳春金長唐葉暄葉集魏鏘  
葉樸等泣言於令始捕奸細引出斬之春等傾  
家財以餉士未幾雲車雲梯至倭舞雙劍飛梯  
而上守兵懼散力士張德奮勇揮斧斬倭首落  
城下李士清朱蓬毛各殺數倭衆始定矢石煩  
銃齊發車梯俱碎相持一月次年正月十五日  
倭空營出松人伏兵四起或伏草中發銃或設  
伏弩或藏地鉤釘板倭死甚衆自是不敢復渡



河有馳倭營奪其牛角夜過河吹之賊營擾亂  
自相攻殺次日督兵二哨出東門擊之又張疑  
兵為襲營狀賊大潰遁去松人出兵尾其後一  
鼓而進倭無噍類

萬歷二十七年七月十六日建安鄉民吳順潘應  
選等惑降五穀童聚眾於郡之鐘樓巷為游徼  
所偵始解散時建陽縣民程覺立亦以左道惑  
眾捕下獄死仍暴其屍三日

先是五穀童降言  
當有古鐘出二十  
六年城西漁人泅水見古鐘一  
因率眾出之吳順等遂借此惑眾

萬歷二十二年三月甌寧謝屯鄉民吳建等持古  
佛號集黨千餘漸事剽掠一郡戒嚴壽寧知縣  
霍騰蛟時視篆甌寧以單騎往曉之會督府亦  
遣材官齎牌傳諭竟不解於是兵憲劉毅檄鄉  
民得便宜擒勦仍發兵屯大厓口官兵未至兵  
先搗其穴建自殺其黨驚懼亦多自殺屍爇如  
山仍傳建首詣郡中霍公南海人文懿公韜之  
後也

國朝



順治四年七月妖僧王和金丹壇人住古田山中借講經聚衆從東溪來攻城時鎮兵遠調防守者少十三日城陷和挾明廢宗鄖西王號召山寇肆掠郡城攻陷旁邑唯浦城堅守得全五年大將軍部堂統師至郡豎柵掘塹困之和無措令城中老稚誦摩訶般若波羅蜜六字冀以解圍大兵於四月朔用紅夷砲從西門水流堀急攻三晝夜聲不絕初二日和於寧遠門關聖廟給散火藥忽爐中火飛燃火藥和遍身焦爛初三日

大兵進焚善見塔及通都橋初四昧爽入城血刃三日鄖西爲亂兵所殺和投智井不死撈出伏誅闔城自焚男婦自投水火死者始盡亂始平順治九年妖僧德容本姓陳擁衆千人爲寇由建陽入甌寧界焚燒民屋掠男婦拷餉所過村落爲墟賊聚崇安分水關山中官軍至卽遠遁十四年總督李率泰招撫之亂始息

十二年山寇張建起建安南雅口焚擄各鄉十四年巡道李元萃單騎入壘諭以順逆遂投誠尋



叛元萃密計授鄉人殺之四境始寧  
十八年山寇蕭爲堂嘯聚甌寧禾義里居民驚竄  
協鎮賈繼誼捕殺之

建寧府志卷之四十六

終

建寧府志卷之四十六

雜志二

古蹟

建寧府

子城在府城中按舊志云高一丈八尺厚一丈延  
袤四里濠池周遭城外廣度五丈城門有四南  
曰雙門上設譙樓東南曰永慶西曰昭化東北  
曰豐樂創始年代舊志不載意必置州時所創  
以衛州治者今俱廢惟雙門故址

即行都司  
前鼓樓及



濠池猶存

東甌城在南才里按舊志云漢吳濞世子駒發兵圍東甌即此故址猶存考之史記吳王濞反奔東甌求救東甌受漢購殺濞駒亡閩越怨東甌于殺其父勸閩越圍東甌索隱曰姚氏云甌水名出永寧山去永嘉郡城五里入江昔有東甌王都城有亭積石為道今猶在也以是觀之則東甌在永嘉矣而謂建寧有東甌城何耶按史記孝惠三年立閩君搖為東海王都東甌世俗號

為東甌王然則搖所都之東甌即永嘉無疑而建寧之東甌城或閩君搖所築者因從其號亦名東甌城耶則濞子駒所圍之東甌政即此也

古長城在安泰里按舊志云父老相傳古嘗於此為州以土薄水淺不果宋時尚有城隍廟故址通志謂五代時王審知據閩遷城於此其地呼

為黨城黨即長字方音耳

轉運使司在府城中舊子城豐樂門之東按宋乾



德初命諸路財賦悉總於轉運使諸州皆有治所其在建州者與郡學相近元符三年圯於水徙建於府倉之北建炎紹興間燬於兵運使徐琛馬純卽倉北舊址重建東西兩廳門廡廨舍俱備兩廳之中爲詔書亭由南門而東爲類試院爲僉廳門之左爲公庫由西門而東爲修貢堂堂前鑿池跨左右爲二亭環植卉木又有夷白堂環秀亭馬純作後併爲萬象樓樓前有延桂堂西廳之東有裕民堂西有桂堂皆虞德彥作桂堂後爲複屋有聽雪亭寢室東有迎暉堂及寓齋北軒皆漕使周頔作又有清風堂與修貢堂對峙品企中作王述書扁後俱廢元時爲鎮撫衙明初爲建寧右衛倉後爲福建布政分司今燬

提舉司在府城從化坊宋熙寧二年天下諸道始置常平使者中間廢置不常司隨官徙元祐間廢紹興十二年復置專使而臺治猶寓於富沙驛之十五里次年提舉杜杞因漕司舊廨鼎建之內備詔書亭吏舍廡庫分廳廡廳後有遙碧



軒後改為又有複屋皆杜杞作寢室前有志清堂洪

宣德齋軒建王租後有瞻辰軒吳挺名清志堂右有三省而書之

齋宋若水作臨濠有雙清堂杜杞作醒心亭吳挺作紫芝

亭及瑞華擢秀二堂濠嘗產十蓮合跗同莖袁復一因而作此後改擢秀

堂為問濠之北舊有多美樓悠然堂跨水為梁

皆王租所作後併為玉峯樓張濤作樓下有室前曰思

賢周頡名扁後曰歲寒吳挺扁倚城有緣靜亭又有復

庵及讀書堂其東為射圃有正巳亭皆吳挺作後俱

廢元更為肅政廉訪分司明改為建寧府治

國朝因之

舊郡治在府城中中和平理二坊之間漢為建安

治唐為建州寄泊後為州治建立第宅建中初刺史陸

長源後又建廳宇樓庫建中六年刺史高愔建又後為節

度軍治建大廳節度使王崇文建晉為偽殷王延政僭

據建太和殿隨廢宋復為州治建便廳建炎初守韓珉

建設廳僉廳并儀門兩廡架閣甲仗軍資上供

常平支鹽諸庫皆紹興三年及雙門譙樓不知

何時紹興間中有薰風堂張銖建建安堂即鎮武堂在設



廳之迎暉堂即旭景亭故址改為皆和豐堂即

公亭故址改為紹興中守趙士諒建

北園得楊億詩碑玉僊堂隆興初守陳正同建

名碧雲樓不知何時建設廳東有勤公澄鮮旭景二

亭景德中守高惠連建門外有宣詔亭頌春亭張銖建王僊

堂前有連繡亭取舒元與牡丹賦繡悵連接之意留春亭取柳

芍藥詩窈窕留餘春之意皆韓元吉建

山之泉池上有紫霞洲亭皆韓元吉建堂東有思洛

亭淳祐間守王遂建建安堂前有中和齋平理齋向伯奮建

今中和平理二坊即舊名也

堂側有復齋紹興中守程芾建和豐堂

東有射圃圃有正巳堂紹興中守宋暖建城上有風月

堂即舊子城及慢亭培基城上為城下有良泉

韓元吉建

惟慢亭僅存崇禎間改祀旗纛神餘亭堂俱廢

其故址及園並入行都使司後為都察院今廢

福建行都指揮使司即舊郡治今廢

斷事司在行都司直街之西宋西通判廳元甌寧



故址明為斷事司後燬

國朝康熙三十一年甌寧縣令鄧其文即舊址建先

儒書院後為文昌閣左為義學右為射圃

建寧左衛指揮使司在行都司之東即元叅政魏

添祐故第明為左衛署今廢

國朝康熙三十二年甌寧縣令鄧其文即舊址遷建

廟學

建寧右衛指揮使司在行都司之西即宋觀察推

官廳明為右衛署今廢

### 建安縣

舊建安縣治在寧遠門內漢時縣治在平理中和

二坊之間即行都司廳堂廊廡畢備知縣石廉又有門

樓知縣葉蒔建以藏勅書簡孚堂在縣獄傍知縣常御孫扁

南山堂知縣俞南仲建清心堂向上凌風亭韓元吉建告春

亭即梅亭也知縣張業作手詔亭頌春亭列齋有井極清列韓元吉

榜是元縣尹徐屬移縣治於從化坊故址廢為

軍民住舍舊有尉廳距寧遠門二里許今亦廢

故址猶存



舊廟學在府城叢桂坊宋慶歷四年分廟學為二  
 廟在建溪門之東學在府治南趙氏坊建炎後  
 郡守劉子翼建學於叢桂坊并立廟於學後圯  
 於水惟大成殿僅存郡守張銖重建內有御書  
 閣藏書樓紫芝堂後學遷崇儒坊明為甌寧  
縣儒學又  
 遷於中和坊即今府學其故址元時為五通廟明為  
 建寧左衛軍人住舍今燬

貢院在登俊坊按舊志云建安歲貢士而貢院屢  
 經焚燬宋紹興間運判邱礪先守是邦後領漕

事以眾樂園及園旁近地鼎創之內備考官直  
 舍膳錄彌封院及廳廡等制元時合試於浙江  
 行省貢院改為劉屏山書院以是地為劉琪故  
 宅故也明洪武十一年改為建安縣儒學學遷  
 又改為新察院今燬

建寧路類試院在府城宣化坊按舊志云宋景祐  
 四年從賈昌期之請命諸路轉運司類試舉人  
 乾道中運使沈樞始即南門之左創類試院以  
 為試所內備考官直舍膳錄彌封院及廳廡等



制元改剗廉訪分司衙明廢為軍職住舍今燬  
 主管廳在府城中和坊宋時設即舊鹽倉廳事元  
 為劉萬戶西廳明為府經歷解舍今燬  
 幹官廳在府城中和坊山棗岐下其故址明為軍  
 職住舍今燬

添差幹官廳在府城平理坊舊鹽倉岐下宋時設  
 後省元初為魏叅政私第明為軍職住舍今廢  
 司法廳在縣治北舊在府治西之西濠宋時設後  
 徙為舊錢監廳與檢踏廳相隣今廢

檢踏廳與司法廳相隣即舊豐國監宋紹興中改

葺已上二廳元明洪武十九年改為建陽衛衛

調改為貢院凡府縣造辦貢獻品物悉於此後  
 改為建安縣學

國朝因之

東通判廳在府城譙樓門東宋紹興間建建炎中  
 轉運司寓治於此後廢元明為建安縣治

國朝因之

觀察判官廳在府城舊西通判廳內後移寓添差



教授廳內後又徙豐國監廢址入建陽衛今廢  
左司理院在府城行都司後爲都察院之左宋紹  
興間建元爲建寧路總管府監房明改爲建寧  
東左衛千戶所後爲民居

錄事叅軍廳在府城都察院左宋時設後移於豐  
國監故址久廢明改爲建寧左衛千戶所後爲  
民居

東南副將廳在府城親睦坊宋時設舊在廣西營  
後徙於此元廢其故址明爲軍營今廢

節度推官廳在府治東後徙豐國監宋設元廢其  
故址爲民居

左獄在從化坊宋紹興間建元爲女師堂明洪武  
間爲府獄景泰間遷入府治內舊址爲東甌書  
院後廢

舊府社稷壇在府城東寧遠門外光孝觀之右先  
是唐永徽初刺史張文琮始建壇於臨江門內  
富沙驛之側宋建炎末燬於寇紹興初再建復  
壞於水郡守張銖卽舊址修築郡守黃適以其



地雜民居徙於城東風雲雷師壇附焉淳祐甲辰郡守王遂築風雨壇於社稷壇右雷壇於社稷壇左元廢爲勸民之所明爲軍民園圃俱廢舊縣社稷壇在府城寧遠門外舊縣治西宋紹興間建元時爲民居園圃明爲顯祐祠後廢省倉在中和坊宋乾道七年太守趙彥端建儲粟以給官軍俸糧蓋有司倉也各縣同元廢其故址明爲官民房屋

常平倉在中和坊宋乾道六年建元廢明卽故址爲建寧左衛千戶所後廢

學事倉在崇儒坊宋乾道間建以儲七縣學糧錢鹽月發以贍學元廢故址猶存

鹽倉在平理坊之山棗岐元廢其址今爲民居建寧左衛倉三所一在宣化坊一在中和坊府學後一在親賢坊今廢

建寧右衛倉二所一在宣化坊一在德勝坊今俱廢

廣惠倉舊志所載一十四有名無考宋季俱廢



社倉七所在東長安秦建寧南才川石順陽六里  
內後俱廢

舉子倉一十七所在吉苑建寧登仙將相房村安  
秦秦溪內外東長南才順陽川石十二里內宋  
季俱廢故址猶存按舊志云社倉舉子倉非官  
司所掌其原出於鄉先生鄉大人念饑民而輕  
犯刑辟者於是與其里人仗義協力買田積穀  
立爲社倉每倉一所鄉官一名主其出納每歲  
以九月歛收五月給借是曰社倉又念貧民生

子不能舉者相與議立舉子倉以賑給之付各  
鄉附近寺僧理其事凡四等以下之家遇受孕

夏五月以上者書于籍免乳日人給米一石二斗  
鄉官專主名數僧司出納其所支米以帥司義  
莊及倉司佃戶租課克給非屬鄉官所掌則聞  
於州縣而以常平錢給之始則行於 都次則  
推於一鄉人旣便利乃請有司廣其惠於一路  
常平帥司皆樂主之各縣同宋李綱有歐粵銘

見藝文

文



軍資庫上供庫鹽錢庫常平庫免丁庫米麥庫學

事庫牙契庫樓店庫甲仗庫架閣庫物料庫支

鹽庫贓賞庫專掌贓罰之直公使都務上一十四庫一務俱在舊府治

內皆宋時設元廢其故址明改為行都司六房今廢

合同場在登俊坊宋為府花園後為都監司紹興

改為批發茶引場元廢後為民居

夏秋二稅場舊志有名無考

威果第二十七指揮營在親睦坊東濠上宣毅營

故址宋元祐間建建炎間燬紹興初復置營房

一百五十三間中為將廳初額五百人設將校

長并指揮使領之後改為廣西營元廢其故址

明為建寧左衛軍營後燬

廣節第四指揮營在縣治東政和門內宋設元豐

三年陞為禁軍下四營同初額三百五十人元祐三

年添補百五十人為五百人建炎兵燬紹興復

置元時更為南營後廢其故址明為建寧左衛

軍營今廢

廣節第五指揮營在親睦坊宋建營房一百五十



間元廢其故址明爲建寧左衛軍營今廢

保節第十指揮營在崇儒坊內與南營相連宋熙

寧七年建營房一百八十四間額領四百一人

元更名保十營後廢明爲建寧左衛軍營今廢

保節第十一指揮營在親睦坊宋熙寧七年建營

房八十二間額領四百四十一人元更名保十

一營後廢其故址爲軍民房屋所

保節第十二指揮營在崇儒坊宋熙寧七年建營

房一百四十二間額領三百三十一人元更名

保十二營後廢其故址明爲建寧左衛軍營今

廢

豐國監營在中和坊行都司後爲都察院之左宋

咸平初建以鑄錢上供後改爲檢踏廳元廢明

卽故址改建陽衛衛調改爲貢院後改爲建安

縣學

壯城營在宣化坊宋熙寧初建專克修城之役元

廢明卽其故址爲本府廣實倉

大教場在縣治西和樂坊宋淳熙間建明廢故址



人爲軍民房屋

府教場在舊府治和豐堂左四圍幾百餘步中有  
正巳堂宋紹興間建明廢故址人行都司後爲  
都察院今廢

舊縣教場在縣治東舊尉司前社稷壇後宋紹興  
間建明廢其故址爲軍民房屋

蘆場鐵坑

後樓鐵坑

上二坑俱宋紹興間置明廢

銅坑在吉苑里四都明廢

深下鐵坑在吉苑里六都明廢

熙然堂在白鶴山前宋慶元三年太守黃適搆以

爲勸農之所宏治間僉憲胡恭有記見藝文即今

所傳探春亭是也後廢址爲民居

宋胡文定祠

宋游御史祠二祠俱在舊府學明倫堂之左右宋郡守陳正同建明廢

望京樓

鳳山閣已上樓閣俱在吉苑里俱宋太平興國間建

溪山一覽亭在紫霞洲東舊志云朱文公搆後廢



乘風亭宋紹興間漕使周頡建

甌寧縣

舊郡城在城南紫芝坊覆船山下吳永安三年太守王蕃築宋元嘉中遷城黃華山下隨復其舊唐建中元年仍移治於黃華山下舊城遂廢故址猶存

舊甌寧縣治在朝天門外太平坊今其地入城內宋元祐四年建紹興四年知縣范璿復建明洪武元年知縣展鑑又即故址再建內備丞簿尉

諸廳東有不欺堂後名思古知縣林朝俊建劉唯重修北有琴暇堂西有浮香亭皆林朝俊建縣治後又有民肥堂更名高遠知縣魏彥材建元時縣遷於舊西通判廳明遷於宣化坊其故址為建寧右衛倉明廢

西通判衙在譙樓門內宋設先為他官公廨後添置俸即此為廳隨因員缺以貯鹽貨慶元間郡守趙善防復其舊元建為甌寧縣明改為行都司斷事司後為指揮衙今廢



左司理院在平理坊宋紹興間設元併爲甌寧縣  
明改爲建寧右衛前千戶所今廢

省馬院在縣治西舊治於昭化門外宋慶元三年  
遷於郡射圃內元廢

都作院在乎惠坊宋設明爲軍民住舍

觀察推官廳在平理坊舊鹽倉後宋設元爲錄事

司明併爲建寧右衛今廢今建講堂

路分廳帳西廳俱在乎惠坊宋紹興間設元爲馬  
萬戶衙明爲職官住舍今廢

司戶廳在陞華坊卽舊醋庫址初在大中寺側後  
以其地建斬王廟遂徙於此元改建爲監察御  
史衙明爲軍職住舍

常平提幹廳在明德坊宋設後廢爲民居

監合同場官廳在建溪門內宋設後廢爲民居

兵馬押監南廳在大中寺門右宋設後入大中寺  
兵馬押監西廳在臨江門外平政橋側溪岸上又

云排岸司宋設元廢明爲城基

舊社壇在縣治西宋紹興間建元廢明卽故址爲



建寧右衛倉後廢

都監倉在平理坊宋建元爲軍器庫明改爲建寧

右衛軍器局後廢

行用庫在和義坊元建後廢明洪武八年重建永

樂七年省成化初進士吳文元買建安縣學傍

地易其地爲居第

都稅務監稅務俱在平理坊宋設元廢後爲民居

抽解場在尚書坊元廢明爲城基

惠民東局在和義坊大中寺側宋設後廢爲民居

惠民西局在平政門之左與都監坊相對宋設後

廢明卽故址爲旌善亭今廢

保節第十三指揮營在威武門內掄秀坊宋熙寧

七年建營房一百一十九間額領一百八十一

人元改名保十三營明爲建寧右衛軍營後廢

保節第十四指揮營在乎惠坊宋熙寧七年建營

房三十七間額領三百三十人元改名保十四

營明爲建寧右衛軍營後廢

都作院指揮營在乎惠坊宋熙寧六年建內貯材



木設兵匠爲造作之所建炎間燬於兵紹興十  
年重創元廢故址爲宣武王廟明爲軍職任舍  
今廢

寧節指揮營在府城內西濠上宋紹興十一年諸  
軍揀汰中傷老病將校下諸州養老克牢城指  
揮乾道九年改寧節指揮營元爲軍營明爲軍  
民房舍今廢

左翼軍營在臨江門內宋紹定間置爲統制官駐  
兵之所元廢後爲軍民房舍今廢

雙溪閣在廣澤坊宋建元廢明爲城基

呂蒙宅在城南開元寺吳呂蒙僑居於此

徐丞相宅在明德坊明爲職官任舍今廢

雅歌堂在府城府教場內宋紹興間建

善教堂在城西敬客坊宋嘉定間建

濟川亭在平政橋左宋乾道間建中有觀風亭俱

火後郡守張叔椿重建

上亭臺  
堂俱廢

迎旆堂在威武門外宋隆興間建爲迎送之所後  
廢爲城基



將歸亭在萬石坊宋紹興間建後廢今爲官路  
富沙亭在縣治西宋紹興間建元廢今爲民居  
放生亭在平政橋左宋天禧間建

放生池初遷置不一後以平政橋濟川亭下兩溪  
合流處爲之後廢今有放生潭三字立碑潭上

豐國監池監廢池存行都使司旗纛廟後其故址

也宋熊克修北岡水道記

見藝文

朝真亭在尚書坊富沙廟右天慶觀南舊爲望拜  
之地後廢

府學孔聖碑像聞自黃梅縣飛至建陽郡守命移  
置郡庠碑上勒黃梅縣字建安令黃巖符驗記  
其事於碑陰今碑存

### 建陽縣

大潭城在縣治西隅舊無城粵王因山勢築城以  
拒漢下瞰大溪故以潭名之城久圯元至正間  
陳友定因故址增築西北跨山東南瞰大溪長  
約三里高二丈廣七尺環繞縣治闢東西南北  
四門後復壞明宏治二年知縣張津築新城仍



舊址

閩王城在崇文里地名城村周迴有土堆如城其中平坦故老相傳即閩王殿基外有水田環遶乃舊城濠按舊志王審知築城建寨於此有叛大將據之不得乃以其寶物棄洲中今鄉民呼其地為王殿村為城村洲為寶蓋洲

雙溪在水南朝天樓下明永樂間右支壅塞

洗馬窟在朝天橋下沙中邑人浴馬於此今沙塞

丞廳

簿廳

尉廳

上三廳俱在縣內  
宋建明為縣廨

后山河泊所在崇泰里明洪武十六年建正統六

黃年省廢址佃於民

弓手營在登高山下宋慶元間知縣儲用創為教

閱之地後廢今呼為後營巷同由樓下舊亦有

營舍今名營前巷

省倉在縣治內宋後廢

社倉九所在西隅永忠崇文北樂興賢崇化永平



等里內後俱廢  
舉子倉十所在縣西景福院及樂田崇泰永忠嘉

禾興賢崇政北樂建中等里內後俱廢

省庫在縣治門內宋立明為縣廨

大同山場在崇政里

黃洋場在崇化里

快倚樓

壯哉樓

上二樓俱慶元二年知縣儲公用建

敬簡堂

絃歌堂

二堂俱宋乾道中知縣王滙建

近民堂宋紹興間知縣黃謙建

上樓堂俱縣治內廢址明并為縣宇

道源堂在崇泰里雲谷上宋乾道中朱熹建堂廢

址存

晦菴在雲谷上朱熹建今庵廢址存

勉齋草堂在三桂里考亭西宋慶元六年朱熹卒

門人黃幹率諸生建草堂服喪廢址猶存

讀書室在縣治北宋建後改為龍亭庫廢址猶存

望考亭在三桂里南唐侍御史黃子稜建以望其



親墓因名其里按陳氏族譜云侍中陳遜構亭  
望其考廣寒先生未知孰是後文公築室以居  
人遂呼朱考亭云

聚星亭在下考亭宋丞相陳升之建

放生池在縣治西雙溪閣下宋鑿後廢

汲古井在考亭書院內朱文公題井欄上有嘉熙

一二字後廢

龍洲社在考亭龍舌洲上祈雨甚驗今址無存

葢竹社在考亭社里中姓氏尚可攷如陳誨陳和

仲昆李陳徽猷之孫陳垣陳萬年陳履道陳遜

陳旭悉集於此社

朱熹宅在三桂里考亭書院右卽今滄洲晚築

江爲故宅在三桂里瀛洲橋頭卽靖安寺是也蔡

元定貶道州時朱文公餞之於此今廢

邱子野故宅在東田芹溪六曲棟宇猶存

容膝軒在考亭陳國器建今廢朱文公題容膝二

字今存

清邃閣在考亭書院宋慶元丁巳朱文公跋李參



仲行狀於閣中

虛直軒在治西宋王簿汪恭建熊禾有記

三賢堂在莒口前村宋翁道源建與熊禾謝枋得  
講道之所

浮翠亭在永忠里麻沙

僊水亭在興忠里羅漢山麓相傳漢梅福僊遊至  
此愛其水清潔以石甃砌爲井元至正間道人  
鄭覺清建亭於上因名

景福寺在崇泰里西山宋淳熙乙巳三月朱文公

跋米元章帖於此

雲際寺在仁德里後廢

東山觀在三桂里交溪之澣明嘉靖癸未知縣項

錫改爲大儒祠

崇安縣

魏王城在武夷山南按武夷志魏王子騫築城於  
此

舊丞廳在興賢坊營嶺之右宋建內有近民堂清  
真堂縣丞楊注建元廢後爲民居



舊簿廳在興賢坊左內有簿書庫修景堂繁陰閣  
西爽亭敬齋俱宋主簿吳輔建元縣尹彭庭堅  
通改爲文定胡安國書院

舊尉廳內有甲仗庫武觀堂梅隱亭君子亭畏齋  
俱元縣尉方昭輔建又有南熏亭寒冽亭覆井  
上俱元縣尉葉森建後俱廢爲民居甲仗庫梅  
隱亭君子亭爲儒學射圃

主學廳在營嶺南其址明爲儒學厨庫

鈐轄廳在營嶺左宋建後爲鎮守衙故址明爲射

### 圃

鎮守衙在營嶺左鈐轄廳故址元爲二奕千戶議  
政之所明廢爲儒學射圃

### 新附奕

郅復奕二奕俱在營嶺之右元建爲鎮守屯軍之  
所每奕設千戶一員吏一人彈壓二人以

輔明洪武元年改爲城隍廟今因之

醫學在澄清坊元元貞間縣尹楊靚建有明理堂  
元至正間燬於兵後爲民居

皇華館在嶺南左宋設明爲民居



安樂堂三所在興賢坊營嶺右石雄里之楊家庄  
豐陽里之黃土坂俱宋時設凡軍旅往來遭疾  
者棲此惠民局給藥療之廢址猶存

設飯堂在石雄里之分水關元延祐間宣慰馬合  
麻度關憫負擔饑劬乃捐金建屋市田以飯行  
旅歷三年合麻故飯不復施基址尚存

省倉在營嶺左宋建明爲稅課局今因之  
學倉在興賢坊儒學右

安撫司社倉九所在仁義坊及上梅黃村會僭豐

陽南平大渾石臼等里

提舉司社倉八所在從籍里之長坂東山大王嶺

登山下四所在五夫里之連墩胡塘古亭大坂

上倉創於朱熹其後遂行於天下詳見熹記廢址猶存

舉子倉安撫司二所在豐陽里之黃亭及會仙之

武夷冲祐宮提舉司一所在營嶺

上倉俱閩帥趙汝愚建廢

址猶存

均惠倉在營嶺宋嘉定間知縣傅壅以春夏之交  
民艱食因建倉賑之廢址爲民居



豐惠倉在營嶺右宋咸淳二年知縣劉漢傳建自  
均惠倉規約既壞往往有賠償之患漢傳節俸  
餘置田收米立倉儲之或遇大祲隨宜減施其  
廢址爲民居

鹽倉在縣廳西宋淳熙元年知縣王濟輿建元典  
史劉祐以其址建架閣庫至正間燬故址猶存  
銅庫在常平倉內宋設元改爲際畱倉明因之  
省庫在縣廳西宋乾道九年知縣王濟輿建元燬  
故址猶存

酒務在宣化坊左宋設其故址爲民居

惠民局在譙樓之右元泰定間縣尹彭好古建是  
年又遷建於宣詔亭之舊址其地明爲旌善亭  
杏壇在儒學明倫堂後元至治中縣尹劉沅祖重  
立作亭其上後廢明卽故址建尊經閣

舊社稷壇在興賢坊嶽司之側宋淳祐間知縣陳  
樵子建元元貞元年縣尹楊靚以明宮齋庫廢  
弛復新之後廢明洪武九年移於興賢坊後爲  
民圃



翁承贊宅在吳屯里承贊嘗爲諫議大夫今邑人猶呼地爲大夫闡

胡安國宅在從籍里胡坊舊名籍溪安國嘗以朝廷所賜金令從子原仲因舊基重建後人稱爲文定書堂

胡憲宅在胡坊扁曰山居宅廢址存

劉韜宅在五夫里潭溪中有一枝堂韜父民先所建狀元張李祥書扁

張靄宅在會僊里靄父義居建陽文強里因聚會僊里石村傅氏遂世居於此宅廢址存

劉斐宅在貞節坊之黃屯中有披仙樓知足亭雲堂南軒林稍閣西圃洗心沼白圭泉俱廢本西林靈順祠卽其故址

江贄宅在豐陽里廬峯陽贄常舉八行甫舉遺逸並不就邑令陳難立坊旌之後宅廢人呼其地爲八行窠

劉子翬宅在內五夫里屏山之下潭溪之上子翬自莆田倅乞歸居此中有六經堂早賦堂悠然



延寧府志  
堂橫秋閣涼陰軒山館萬石亭意遠亭懷新亭  
百花臺醮醮洞海棠洲蓮池橘林桂巖醒心泉  
宴坐巖南溪凡十七處子翬各賦詩紀勝後朱  
熹爲書刻於石上今宅廢址存

劉韞宅在縣南九曲巷韞韜弟也仕宋歷倅三州  
典二郡歸隱於此所居宅有家山堂拙致堂昉  
齋山人方丈龜峯樓月波臺積芳園藥圃春谷  
香界晚蔬秋香徑曲池軒前村秀野朱熹爲作  
十五詠以紀其勝今廢

劉勉之宅在五夫里白水鷺子峯下扁曰草堂卽  
劉子翬胡憲朱熹相與講道之地宅廢址存

朱熹宅在內五夫里潭溪之上熹父松以後事屬

劉子羽子羽爲築室於里之傍熹奉母遷居焉

扁曰紫陽書室以新安有紫陽山示不忘故土

也寢室曰韋齋熹父號韋齋承松意也又扁

別室曰晦堂敬齋義齋自爲名堂室記年六十

三始移居考亭廢址猶存

蔡發宅在節和里之黃沙扁曰牧堂發元定父也



贈少保今廢

通鑑堂在里仁坊舊光化寺右宋營邱張仲隆嘗  
於寺建室不置餘物獨取資治通鑑數十帙列  
置其中焚香對之日盡數卷因名後廢爲民居  
漢祀臺在武夷冲祐觀漢武帝遣使置壇祀武夷  
君至今歲祀於此

唐刻石在武夷換骨巖下唐明皇遣使封名山大  
川登仕郎顏行記

閩王戰場在上梅里舊傳爲閩王習戰地

高遠樓在縣治琴堂後宋寶祐間知縣趙時鏐建  
文會樓在縣治廳側元至大間縣尹完顏銳建  
三姓市在舊縣治前卽營嶺也未設縣時止三姓  
開市於此

步罡石在虹橋北昔有黃巫學禹步之法於此石  
有足跡

浮香閣在縣治後圃宋淳祐間知縣詹元輔建廢  
址猶存

新州海石宋紹興間胡致堂謫新州嘗坐此作讀



史管見歸自新州行李蕭然唯帶此石趙庸齋  
詩記之

綠野堂在里仁坊宋康定間知縣趙抃建

宴巢在黃村里金鰲峯詹駉嘗構萬卷書樓宦歸

平日設宴以飲宗人

思獻堂

仰瞻堂

上二堂俱在縣治後周宋紹興間  
知縣王純建詹元輔重修後俱廢

登春堂在畫錦坊宋紹興間知縣陳叔嘉建

明理堂在澄清坊舊醫學內元元貞元年縣尹楊

靚建

柱笏軒在縣治內高遠樓之旁宋寶祐間建

見山堂在縣治棗堂之側宋景定間知縣張嗣孫

建

挹清亭在待賢坊左元泰定間縣尹彭好古建爲

使客憩息之所

溪光亭在待賢坊左宋建明洪武間改爲長平驛

水亭

覽秀亭在興賢坊舊鈴轄廳內宋紹興間王安重



建

盍簪亭在營嶺左宋建廢址今為民居

橫舟亭在縣治內之西圃

緩步亭在縣治內舊浮香閣外

宣化亭在宣化坊宋為王通直祠後為妙應堂元

泰定乙丑縣尹彭好古改建宣化亭

風泉亭在內五夫里之白水峯宋吳濟建朱文公

題扁

黃亭在豐陽里宋建亭以黃名取土尅水之義

拜郊臺在建平里之小南山舊傳漢無諸王嘗於

此拜郊

水雲寮在會仙里武夷山茶洞之側宋游九言建

上俱廢

清獻梅碑在縣治後堂梅為公手植邱應甲刻碑

贊頌之

浦城縣

越王行宮在縣東隅漢越王餘善建後廢今勝果

寺即其遺址



三孔廟在孝弟里明廢

江文憲公祠在上相里等覺寺又宋大觀初知縣

陳淮建以祠江淹元廢

舊丞廳在縣治東南

舊簿廳在縣治西

舊尉廳在縣治東北

監稅廳在縣治東南

四廳俱宋建今為民居

皇華館在縣北隅吳永安中建時改縣為吳興因

名吳興館宋改皇華館元廢今天心寺即其址

也

西陽館在登雲里上有額曰披雲亭即古西陽亭

吳山司在募泰里為開辦官居止之所後廢

縣務在東隅宋建後為民居

東倉在縣治東

西倉在縣治西

二倉俱廢

社倉二所在長樂東禮等里後廢

舉子倉一十二所在縣郭及沿山郊陽高泉安樂

忠信人和清湖通德載初長樂等里內後俱廢



鹽倉在縣治東

常平倉在縣治西

益亭倉在安樂里

上三倉俱宋建後廢

省庫在縣治東廡

常平庫在縣治西廡

上二庫俱宋設明為縣廨

醋庫在縣門外左宋建後為民居

製錦堂在縣治東宋縣令吳中美建明為典史廨

楊億讀書堂在長樂里能仁寺右堂廢故址尚存

章得象讀書堂在上相里西巖嶺麓堂壞故址尚

存

真德秀宅在縣東隅越山下舊有花園元末廢明

成化十年築城以為軍營

楊徽之讀書堂在上相里夢筆山麓等覺寺右堂

廢址存

夢筆山房在夢筆山麓真德秀建魏了翁為記

彩門樓在德星門外馬車街有彩門舊跡四字相

傳為宋章氏諸族聚居於此

碧草亭在上相里等覺寺前宋建元煨故址尚存



會飲其上因名廢址猶存

綠波亭在縣南溪側宋建迺送之所元廢故址尚

存後為關王廟

睦亭在長樂里遷陽鎮之西山宋真德秀建取睦

親之義德秀自為記元圮故址尚存

鍾離亭在招賢里百丈山之東宋廢

越王臺在縣東越王山之巔舊志云越王築臺置

烽堠於此後廢國朝順治三年知縣李葆貞

重建

魏司馬西橋在招賢里

桂林橋在招賢里乃節婦徐彩鸞卒處

高峰橋在上相里近南峯寺

等覺橋在上相里等覺寺之下即夢筆山前之橫

溪

上同橋在永康里

五橋俱廢為渡

高巖橋在大石里今圮

臨江橋在劉陽里臨江嶺今壞

人安橋洪武年里人季子祥等建



濟川橋洪武十一年里人林仲和等建上二橋俱泰寧里今

皆廢

松溪縣

松源鎮在飯伏里即舊縣也宋開寶間縣遷故址

猶存

尉司在縣治西偏宋開寶間建在簿廳之左舊稱

縣尉王益生安石於此李綱母夫人館於是生

綱考忠定公文集安石似生此地而綱則從夔

尉松也董良楨扁曰古劍峯堂以面湛盧得名

舊儒學在縣治東後山之陽宋景祐三年建乾道

九年學移置縣東故址猶存

舊驛舍三所在縣內及善政東平二鄉俱宋時置

廢址猶存

使華館在縣市南宋紹興間知縣林敏元建元季

廢後為民居

宋社稷壇在縣南元季廢故址猶存

建新弈在縣治興賢坊廢址猶存

郭復弈在縣治南廢址今為山川壇一弈俱元初



立爲屯兵之所

梓亭寨在縣北七十里卽處州龍泉縣松源鄉之地宋時建兼管龍泉遂昌松溪政和四縣境元改隸龍泉縣廢址猶存

鹽倉在縣中門外西偏宋建元廢明爲縣獄省倉常平倉二倉俱在縣中門外東偏宋置元季廢其址明爲際留倉

社倉在善政鄉松溪里後廢其址猶存

舉子倉六所在縣南普載院及皈伏東關上元杉溪永寧永和濠田等後俱廢

省庫

常平庫二庫俱在縣治內東偏宋設明爲典史廨舍

劍峯堂在縣治北宋開寶間建後爲主簿廳明爲知縣廨舍按舊志謂宋臨川缸尉松溪生丞相安石於此又文忠公李綱母夫人由龍泉歸館於是綱實生焉邑人以爲勝事而一統志又謂宋右文修撰李夔生子綱於華亭桂閣明建九



峯書院并祠之未知孰是

會春亭在遂應場圓珠山宋隆興間舍人林癸建會飲其上因名廢址猶存

放生池在縣市南惠政橋東大溪之傍宋時開元爲水所決淪於溪

鑄劍爐在湛廬山中相傳歐治子鑄劍於此遺迹尚存

吟室碑在湛廬山朱子書吟室二字今民家多摹爲扁

龍津巖在杉溪里夙屯牛皮灘巖上有龍津二字

趙吳興筆今見在

政和縣

福建廉訪分司在縣治後後廢

舊縣治在政和西里十六都天王寺北卽舊關隸

鎮宋咸平三年陞鎮爲縣遷治於感化里東岸

口廢址猶存

舊丞廳在縣治西百餘步宋建炎二年丞省廳爲

縣尉司後司復舊所又改爲使華館今龜巖寺



卽此地也

舊簿廳在縣治東後改爲省倉故址猶存

稅務在舊使華館西宋置建炎二年省故址入龜

巖寺

鐵山營在感化下里四都唐招討使張謹屯軍之

所故址猶存

東際營在高屯里二十四都唐御史中丞李彥堅

屯軍之所故址猶存

建新弈

郢復弈

二弈俱在七星橋元都元帥僉事彭廷堅屯軍之所其北明爲城隍廟

鹽倉在縣東偏宋建

省倉

常平倉二倉俱在縣治東

上三倉廢址並爲縣廨

舉子倉三十一所在縣坊龜巖寺及東衢感化長

城東平政和等里內後俱廢故址猶存

省庫

常平庫二庫俱在縣治東廢址明爲縣廨

致爽亭在報國院西序



得初亭在縣治東二亭俱紹興間縣令劉季裴建  
後廢

放生池亭在考口溪側宋時建元圮

壽寧縣

狀元坊在福安里宋紹定間為繆蟾立今廢

建寧府志卷之四十六

邱墓附

建安縣

唐

建州刺史李頻墓在將相里小源深永落洲按唐

書本傳云盜發其塚壽昌人為之掩覆又鄭谷

哭頻詩云合終歸故里末歲道如初則頻墓不

在此可知今郡人傳言頻刺史時愛此山水歸

卒後其棺自壽昌飛至益荒唐矣蓋梨山係郡

名山云



五代

章仔鈞練氏夫人墓在府治後

宋

奉直大夫朱鑑墓在秦溪外里八仙鋪

文公長孫也

提舉朱林墓在秦溪外里

侍郎朱浚墓在登仙里之小溪

文公會孫也

侍郎劉炳墓在吉苑里銅場鳳凰山

刺史鄒誠墓在吉苑里東岸口

侍郎朱在墓在府城東永安寺後明永樂間其地

宋

為寺僧所據景泰二年八世孫沆等聞於官復

之文公季子也

明

孝子陳榮墓在郡城東吉苑里瑞峯下馬腰嶺

尚書鄭錫墓在將相里西焙

贈少傅楊達卿墓在府城東白鶴山之麓

文敏公祖

贈少傅楊伯成墓在房村里龍津壠

文敏公父

布政連均墓在將相里樊山之源

都指揮徐信墓在府城北煙源



郎中滕員墓在房村口小蒙洲員殉土木之難以  
衣冠葬此

編修龔錡墓在吉苑里上坑討沙尤寇遇難以袍  
笏葬此

工部郎中龔沅墓在建寧里之金盤子錡

工部侍郎范嵩墓在登仙里劉坑舖

楊文敏公夫人劉氏墓在城東白鶴山麓

甌寧縣

宋

封州守曹觀墓在城西慶勝院後觀死節封州歸

葬於此墓上有  
旌忠亭

忠穆公鄭穀墓在府城南紫芝峰下開元寺右

忠肅公劉琪墓在豐樂里妙湛寺南

忠肅公徐清叟墓在和樂里祝墩之月山

先儒童伯羽墓在豐樂里下乾北山

公主墓在府城南紫芝坊光孝寺後理宗女  
朱浚妻

元

楊萬大祖墓在豐樂里楊墩俗名白  
裡墳



明

文敏公楊榮墓在豐樂里館前山之原

吏部尚書李默墓在城西敬客坊

兵部左侍郎僉都御史滕伯輪墓在小湖羅經山

尚書楊旦墓在龍山

知府楊百朋墓在宜均赤山

奉直大夫張沛墓在慈惠里西際

御史謝朝佐墓在吉陽里宅墩

建陽縣

唐

劉處士墓在建忠里 孝子劉常父

開國公劉翽墓在永忠里

庇民王墓在三桂里水南後版

廣寒先生墓在三桂里水東源子侍郎陳遜構亭

兼望之扁曰望考亭因名其地按舊志黃端公亦

有厚望考亭以二氏族譜考之則黃尚書墓在樂

田當從陳遜為正



贈太師魏國公陳儼墓在三桂里資化寺勅建

游復墓在歷衢源

楊時志

莊肅公游九功墓在崇政里

草堂劉勉之墓在三桂里

朱文公撰墓表

贈朝散郎忠烈公劉純墓在崇化里南溪

先儒胡寧墓在樂田龍潭坑上

安國仲子

先儒胡宏墓在崇文里黃亭鼓樓嶺

安國季子

先儒胡憲墓在樂田里鳳歷山

安國從子

先儒文節公蔡元定墓在崇泰里翠嵐梘頭

劉文簡志

先儒蔡淵墓在均亭里石溪嵐頭

元定長子

先儒蔡沆墓在崇泰里九峰東原

真文忠公志

先儒蔡沆墓在崇泰里後山水南橫窠

先儒廸功郎蔡模墓在後山水南考尾隴

沆長子

先儒文肅公蔡杭墓在永忠里留田

沆次子

先儒魏揆之墓在招興里長坂

朱文公志

粵國夫人祝氏墓在崇泰里天湖之陽

文公母

朱文公墓在嘉禾里九峰山下大林谷先是文公

夢曰龍歸后塘乃先生歸藏之所後得地果名



後塘夫人劉氏卒次年窆其穴名其亭曰宰木

而自規壽藏於其側總名其庵曰順寧文公唐石雪中

詩云春風欲動客辭家淋潦縱橫路轉慶元庚

賒行到溪山愁絕處千林一夜玉成花申三月初九日文公卒十一月合葬焉明嘉靖

間御史方涯於墓前建亭堂五楹又去墓八十

餘里地名麻沙建石坊扁曰朱文公神道事方

就緒方代去御史白賁繼至踵成之又置墓田

百石既竣役提學江以達謁墓病瑩域不治享

堂局促重加脩葺復於堂前加屋五楹翼以兩

廡去墓一舍許建坊扁曰宋文公墓道置田七

十五畝為子孫祭及施貧者又念墓所去縣治

百有餘里復於長坪麻沙建朱林公館二所以

館士大夫謁墓及子孫歲時致祭者本府推官

施一德知縣張謹李東光咸有力焉江汝璧有記

中散大夫朱塾墓在崇政里茶壩

御史方直墓在縣治西

熊夫人墓在崇泰里楓林劉文簡公煥母

元



先儒熊禾墓在崇泰里熊邨橫歷

明

翰林院修撰丁顯墓在崇文里白石源

崇安縣

唐

諫議翁承贊墓在新豐鄉東原山口卽其故宅後

宋

忠顯公劉韜墓在五夫里開善寺左拱辰山韜未第時肄業拱辰旣終子子羽遂葬韜於此神道

碑額旌忠褒節四字蓋御書也

忠定公劉子羽墓在五夫里蟹坑

文靖公劉子翼墓在拱辰山之南

獻靖公朱松墓在上梅里中峰院北按文公年譜

云紹興十四年葬韋齋於西塔山其後改葬於

寂歷山中峯之原考文公遷韋齋墓記曰初府

君將殆欲葬崇安之五夫卒之明年遂定於靈

梵院側時熹幼未更事卜地不祥懼躰鬼之不

安乾道六年遷於白水之鵝子峯下又考文公



慶元五年撰韋齋行狀云公卒之明年熹奉公

柩葬於崇安之五夫然公所藏地勢卑濕懼非

久計乃奉遷武夷上梅里寂歷山中峯僧舍之

北按韋齋時嘗有詩曰鄉關落日蒼茫外尊酒寒花寂歷中即此而觀當是

三遷葬此

少微江贄墓在豐陽里

元

杜本墓在縣南存心橋西

藍山過本墓有詩曰皓首山林草太元鶴書微起又歸田一窩自得堯夫樂三策誰知賈誼賢空有墓碑臨道路更無書屋貯風煙後來仰止

前修遠慨想

昇平七十年

浦城縣

唐

光州都督劉楚墓在縣東禮里延慶寺後

處州刺史劉守謙墓在東勝果寺後

太傅章仔鈞母夫人墓號白羊墳

宋

學士楊億墓在長樂里楊村宅後

文忠公真德秀墓在孝弟里珠林山

魏了翁撰墓碑



松溪縣

五代

侍郎陸宏墓在飯伏里濟美廟後宏仕為中書侍

郎會稽南部育民校尉卒葬此

宋

樞密直學士吳執中墓在東關後窠

葉景仁墓在遂應場翁村

政和縣

唐

招討使張謹墓在感化下里

宋

朱森墓在感化下里護國寺西廡外

文公之祖八世孫思謨

詩曰鬱鬱佳城二百年一回瞻拜一潛然掃松  
來借僧家路薦藻猶收縣尉田春水池塘添驟  
雨夕陽巖樹林橫煙芒鞋竹杖無由識深愧絃歌失舊傳

其墓田自宋元迄明相傳託若干畝後人失守

沒於豪家嘉靖乙未僉事王庭行部至政和值

里甲有爭寺田之訐告因得朱氏失田由主簿

李良覈實復命朱氏子孫垣坊省視阡陌考驗



田數悉令原田歸朱氏以供祀事



